

聖
心
月
新
編

上海土山灣印書館印行

No 291

耶穌會李問漁司鐸原著

聖心月新編

上海土山灣印書館印

No 291

2000 3-34

MENSIS
SS. CORDIS JESU

auctore

P. LAUR. LI, S. J.

4^a editio

天主降生一千九百三十四年

上海主教惠

重准

第四版印

聖心月新編序

蓋聞學有本原，澄其本，則泛濫無慮。理有歸宿，得所歸，則蓄洩咸宜。均是人也，或爲聖人，或爲愚人，非降才之爾殊也。其所以注意者有原，其所以致思者有本，於以日就月將而得所歸宿耳。慈主耶穌，憫迷途之莫返，灰志之莫興，惻然發其無窮之愛，顯示敬禮聖心之命於聖女瑪加利大，已二百年矣。而人心之陷溺未拯，人情之偏私未化，諒由於不敬聖心而不敬之故。概由於指引之不力也。雖於聖心之月，晁公敬莊譯述有書，凡好學深思者，或已玩味不盡，獲益良多。惟意

充詞足，難爲淺嘗者收其效。李君問漁，知其故而慨然焉。特於公暇，收集數書，畢爲摘譯，以備一月之用。是月也，每日摘耶穌言行而鄭重及之，使人尋繹而觀感，無一非設身處地之思，無一非實踐躬行之法。誠哉頭頭是道，滴滴歸源。取之不盡，用之不竭。其注意在導引人人，咸知體味。詞則清新而顯豁，意則明白而曉暢。寡學者亦能淺嘗而領悟，將見是書一出，家喻戶曉，咸向作聖之原，而獲永安之慶，庶不負聖心顯示之苦衷矣。因其將付梓，爲俚語以弁之。

聖教後學邢昨蔣超凡題

自序

伏維耶穌，浩浩乾元，蕩蕩主宰。寸丹脉脉，降沙界而爲人。千慮殷殷，寄塵籠以救世。幼居下邑，垂謙已敬。長之型，壯歷名邦。立至正大中之教。時將永別，付聖體於離筵。憂至綦深，流寶血於僻囿。羣黎多罪，本雞肋之堪遺。大主獨仁，比鴻毛而代死。嗟夫，人非木石，誰爲心慙。腸似車輪，實多獍食。卽或感念，大都一暴十寒。偶爾輸懷，未免再衰三竭。是可忍也，復何異於幾希。殆有甚焉，能不傷而涕泗。乃者時當叔季，俗更澆漓。吾主顯形，聖心呈像。嗟下民之愚昧，責信士之怠荒。諭行

月首之儀，用補蒼生之辱。預許隆恩，洪錫富矣。何加示知，丕績榮光，煥乎其有。杖親沾膏雨，常沐恩波。志在必舒，德無由報。自愧意多，續尾欲白，未能。况乎巧讓承鯛，有辭莫達。雖然，鰲戴三山，深知其重。鰲行百步，要竭其能。爰將蠡測所知，証今考古。復乘魚忙有暇，列序成編。措詞固取庸常，敢云指掌。引証必期確切，豈曰列眉。號以新編，用別晁公之舊著。名爲聖月，以資志士之眞修。敢乞明人，不怪彭殤妄作。還期君子，原夫李密陳情。

戊寅季春日耶穌會後學李杕問漁氏題於宛陵學舍

引言

一 敬禮聖心，由來已古，聖奧斯定、聖伯爾納多、聖文都辣、聖女日多達、聖女默底達等，早已恭行。惟一千六百七十五年，吾主特簡聖女瑪加利大，傳佈聖心蘊奧，而敬禮因之日盛。

一 敬禮所歸向者，乃吾主血肉之心，合於聖子之位者。故不可以聖心截然脫離聖身主位而敬之。

一 特敬聖心之故有三。耶穌訓徒曰：汝當法我良善心謙。

可知吾主謙德特在於心一也。心爲仁愛之號，吾主愛人至極，歷受艱辛，敬其心可以報其愛，二也。心爲動人之助，敬禮聖心，所以倍切熱衷，日進於德，三也。

一 敬聖心用敬主之禮。何則，曰禮之高下，不視性而視位，聖心與全身合於聖子之位，實爲天主之心，故敬之用至上之禮。且敬之所歸，不在性而在位，聖心旣以主位爲位，敬之之禮，自宜稱其所歸，卽天主之位。

一 敬禮聖心之宗向有二。吾主愛人至切，無以復加，敬聖

心所以報其慈愛，宗向一。世人多罪致辱耶穌，於聖體中爲尤甚。敬聖心以補其所受之辱，宗向二。

一、敬禮之益多不勝計，吾主許於聖女瑪加利大者凡十。二、賜敬禮者得諸盡職之要寵。三、賜彼等全家安善和好殊常。四、慰伊等於困苦之中。五、若輩生前死後特蒙護佑。六、敬聖心者有所作爲，聖心降以多福。七、罪人於聖心中獲無量仁慈，一如大海。八、勤德者敬聖心，則日進於善。九、勤德者敬聖心，則速成大德。十、凡室中供


聖心像，主必親降殊福。十，傳教者敬聖心，易化罪人至忍之心。十一，引人敬禮聖心，其名刻於聖心中，永不除滅。十二，連九個月首瞻禮六日，善領聖體，恭敬聖心，死前獲領聖事。

一 編中默想，凡三十首，以資一月之用。統括聖心諸德，及敬禮之緣由，皆所以助發熱情，知所取法。想其垂示之意，曰顯現。想其內具之奧，曰尊妙。曰聖善。曰傷痕。想其德之向主者，曰愛主。恃主，恒禱，祭獻等。想其德之施於

人者曰愛人、憐罪、良善、憫困等。想其德之在己者曰貞潔、誠樸、輕世、甘貧、刻苦、忍耐等。想其受人辱、諭人敬、曰被辱、痛悼、憂悶、願望等。惟言簡意畧，在默想者另加推思，庶獲實益。

聖心月新編...

拾



聖心月新編目錄

聖心顯現 第一日
聖心尊妙 第二日
聖心聖善 第三日
聖心傷痕 第四日
聖心祭獻 第五日
聖心愛主 第六日
聖心恃主 第七日
聖心恒禱 第八日
聖心愛親 第九日
聖心聽命 第十日

聖心愛人 第十一日
聖心憐罪 第十二日
聖心良善 第十三日
聖心愛靈 第十四日
聖心憫困 第十五日
聖心愛仇 第十六日
聖心貞潔 第十七日
聖心誠樸 第十八日
聖心安靜 第十九日
聖心謙遜 第二十日

聖心輕世 第廿一日

聖心被辱 第廿六日

聖心甘貧 第廿二日

聖心痛悼 第廿七日

聖心刻苦 第廿三日

聖心憂悶 第廿八日

聖心堅決 第廿四日

聖心願望 第廿九日

聖心忍耐 第廿五日

聖心榮樂 第三十日

耶穌聖心新禱文 見一百十四張

向耶穌聖心贖罪誦 見一百二十張

奉獻人類於聖心誦 見一百二十四張

補辱誦 見一百二十六張

奉獻全家誦 見一百二十八張

聖心月新編

聖心顯現第一日

定像 想見吾主顯露聖心，告聖女瑪加利大傳揚敬禮。

特求 求主賜我領會聖諭，自是熱愛聖心。

撮意 初思，聖心顯現之意。繼思，敬愛聖心之益。終思，敬愛聖心之功。

初思 某年聖若望禮日，耶穌顯現聖心於聖女瑪加利大，宛在火焰中，光耀四射，明亮若水晶，週繞一茨籬，上

豎一十字架，諭示聖女，此受難之具，証其愛人之切，爲諸苦之由來。又一日，吾主重露聖心，告聖女曰：視之，此心愛人至切，何事未嘗爲，直至竭盡心力，以遂其情愫。然余所受於多半人者，忘恩耳，侮辱褻慢耳，於聖體聖事爲尤甚。更可痛者，人有獻其心於子，而依然辜恩負愛。緣是，聖體禮日後第一瞻禮六日，當特定禮日，恭敬予心，償補其榮，是日領聖體，補余心於祭臺上所受之辱。由是以思，聖心顯現之意，欲吾

報其愛，補其辱，慰其憂傷。嗟夫吾靈，聖心所極愛者，非汝耶。聖心所受苦以救贖者，非汝耶。獲罪多端，恒辱聖心者，亦非汝耶。今而後將何以報之，何以慰之。繼思

吾主耶穌顯示聖心，諭令世人敬禮，猶恐人淡忽，依然不能動念。爰許敬聖心者，聖佑特隆，克盡己責，闔家迪吉，常享安康，在艱難中蒙主撫慰，生時死候蒙主護佑，凡行一事，主降多福。犯罪之人，得無限寵恩，如入仁慈之海。冷淡之人，克奮厥志，勉進前程。勤德

之人易成大德，作聖有期。房屋中設聖心像以敬之者，吾主親降遐福。有化人之職者，虔敬聖心，易化忍心之罪人。凡能引人同敬聖心者，其姓氏印聖心中，永不毀滅。修道人虔敬聖心，自能立德成修，不必用他法。幸矣哉，蒙主賜吾認識聖心，得此寵恩之庫，諸德之滙，進修之捷徑，救靈之穩路。吾今定心立志，虔敬聖心，祈主赦我，慰我，助我改惡，導我立功，賜我善生安死，卒享永福於天。

終思

敬禮聖心之功，分內外二種。內者用記司憶聖心之妙，不忘敬禮之事。用明司想聖心之尊，聖心之愛，聖心之德，聖心之恩，并想吾主思言行爲，奉爲準則。用欲司愛其仁，感其恩，賴其能，念念不忘，心心相印。如聖伯爾納多云，我與耶穌如合一心矣。外者克己苦身，誦經祈禱，領主與祭，救困扶危，忍苦辭甘，謹言慎行，仰法聖表，日積善功，傳揚吾主之愛，令人同敬聖心等皆是。吾今思之，豈不能隨機量力，行此善工乎。

聖心尊美 第二日

定像 想見聖心在天，光耀至極，神聖羅拜稱揚，歡忻靡已。
特求 求聖心特賜寵光，使我稍識其奇，感發愛慕之情。
撮意 初思，聖心結合主位。繼思，聖心結合聖靈。終思，吾人
之心，如何仰契聖心。

初思 吾主聖心，自受造之初，卽合主位，永不能離。故吾主
聖心，實係天主之心，尊無限量，宜以敬天主之禮敬
之。且聖心爲吾主生命之原，贖世之寶血卽出於此。

西賢亞立斯多曰。體之貴者。心爲最。則吾主聖體之貴。亦以聖心爲最。昔耶穌釘死架上。二木三釘。與茨冠白帕等。因其偶附聖躬。稍沾寶血。聖教敬以盛禮。奉作珍奇。况吾主聖心乎。敬之更當何如。今在天神聖。常稱頌聖心。聖教中人。亦多欽敬聖心。獨吾罪人。茫茫度日。雖識聖心。而未能愛。噫。吾愚甚矣。自今以後。不復淡忘如此。

繼思 夫人心與靈相合。靈愈美。心亦愈尊。但天上人間。有

如耶穌聖靈之美者乎。則聖心結合聖靈，其尊美可知。按聖多瑪斯之說，心爲神命之助，靈魂發美意，心與有功焉。吾主聖靈，德超神聖，雖一念之微，亦有無限功勳。諸神聖永遠愛主，不及聖靈一念之愛，更能榮主。乃聖心助發其情，尊何如乎。聖賢稱聖心爲雅愛之源，上智之座，仁慈之宇，恩寵之門，此不過讚頌之詞，究不能盡揭其底蘊。吁，吾主乎，奇哉爾心，子靈願一窺妙蘊，而讚揚於無窮永世。

終思

人心之貴，在契合聖心。聖多瑪斯云，心之爲性，愛而已，無愛則不能活。余曰，人心惟仰契聖心爲真活。除此皆不足以安我心，滿我心。所謂仰契聖心者，凡事仰合聖意，好其所好，惡其所惡，思其所思，直至心心相契，夢寐無間。乃吾返躬自問，日間意念紛如，雖欲改悛，恒嗟力弱。吁，吾主乎，獨賴吾力，實無所能，敬求爾心，始無不及。今吾所欲，以心易心耳。求吾主俯聽我禱，遂我所欲，則此外無他求矣。

聖心聖善 第三日

定像 想見吾主，現於聖女瑪加利大，指聖心曰，此乃常生之書，詳載聖愛之學者。

特求 求主默照我靈，賜我稍識聖心之聖善，俾得則效於萬一。

撮意 初思，聖心內備之德。繼思，聖心外著之德。終思，聖心爲人作聖之芳型。

初思 耶穌聖心，結合聖子之位，以天主之聖爲聖，以天主

之善爲善，一若無窮美妙，昭耀於聖心中。聖保祿謂天主聖智之寶藏，蘊於厥躬。亦可謂聖智寶藏蘊於聖心。再思德之高下，視聖寵之多寡。聖母滿被聖寵，遠超羣聖，故其心純善無玷，全備諸德。乃聖心所受之寵，較聖母所受之寵，遠甚無比。則聖心之聖，猶可思議乎哉。耶穌受洗後，聖父從空言曰：此乃吾愛子，快吾意者。誠以聖心至聖至善，故能快聖父之意也。今我自思之，受洗以後，蒙寵甚夥。因獲罪多端，神靈

醜惡，可不痛哉。噫，吾自取咎，尙何言歟。惟仰賴聖心，補我虧缺，增我神力，庶可奮志改悛於後。

繼思 路加聖史紀耶穌幼行曰：厥智及寵，與年並進。此言

吾主之德，蘊於聖心，而漸顯於外行也。夫吾主一生動靜言爲，無一非聖善。聽其言，溫良焉。觀其色，怡悅焉。視其行，莊重焉。聆其訓，精詳焉。察其尋常日用，謙退自持焉。觀其救困扶危，仁衷勃發焉。總之形於外者，根於心，卽其外，可以知其心。吾當默思其行，推原

其意而取法於言行之間。

終思 聖心之德，爲人成聖之芳型。耶穌諭徒曰：汝宜法我

良善心謙。又曰：予今立表，爾曹宜則之。凡此聖訓，皆欲人效其聖表，法其聖心也。耶穌顯容後，聖父自天諭曰：是乃吾愛子，爾輩宜聽之。聽之云者，非特恭聆訓言，而亦仰法聖心之德也。吾自省之，意念言爲，果合聖心之德表耶。聖保祿曰：天主之意，欲爾成聖。按此，則天主生造我，救贖我，恒錫我神恩寵佑，皆欲我

成聖、安可分心他務、以作聖爲緩圖哉。予亦嘗志切
進修、特以畏難而不前、然而無難也。聖伯爾納多云、
凡吾一念聖心、覺心神慰矣。吾其奮袂而起可也。

聖心傷痕 第四日

定像 想見吾主死後，一兵刺其聖肋，透入心中，血水傾流。

特求 求主賜我寵恩，得悟聖痕蘊奧，神靈默念聖心。

撮意 初思，聖心傷痕，爲仁愛之証。繼思，聖心傷痕，爲恩龍

之所由來。終思，聖心傷痕，爲神魂之安宅。

初思 聖心之有傷痕，聖經雖未明言，而古今聖賢，與普世

信人，皆深信無疑也。聖伯爾納多嘗謂吾主聖肋被刺，傷及聖心。聖母告聖婦彼利日大亦曰，予子死後，

一兵刺其右肋，透入聖心，鎗出時，鮮血淋漓，慘然動念。聖女加大利納一日凝神靜禱，問聖心何故受傷。聖父默示曰：吾聖子愛人至極，樂受諸艱，雖至寶聖心，亦所不吝，是以受傷耳。聖伯爾納多又云：聖心傷矣，聖心之底蘊露矣，至德之聖奧顯矣，仁慈之肺腑啟矣。嗚呼吾靈，聖心愛汝，至於斯極，汝亦有幾許熱衷，還愛聖心乎。汝其念之，毋忍心也。

繼思

聖女方濟加嘗見聖心傷中，活水下流，聞主呼喚曰，

渴者來飲。所謂來飲者非他，欲人祈禱聖心，受其寵錫也。聖女安日辣，每以往罪爲憾。耶穌現於十字架曰：吾心之血，乃滌罪之泉，用之可也。何憂悶爲。吾主嘗顯於聖女瑪加利大，指其肋傷曰：神魂之生命，滌罪之泉源，皆隱匿於斯。由是以思，聖心中萬福充盈，聖恩洋溢，可不黽勉求之哉。噫，吾靈穢焉，吾神弱焉，盍賴聖心之傷，滌除舊染之污乎。

終思 聖心之傷，爲神魂之安宅。聖女默底達一夕疾首不

成眠。耶穌示聖心之傷曰：神魂入內斯安矣。聖文都辣極嘆世人之愚，不知潛入聖心中。聖女日多達一日聞聖經之言曰：將賜汝一地。耶穌立刻降現，指其聖心曰：汝知此何地乎？聖女曰：福地也，安宅也。聖伯爾納多云：人見主肋聖傷，須探其肋，進於心中。因聖心乃神魂之安宅，居於內，則傷於情劍，不啻聖保祿與基利斯督同釘於十字架。吁！吾主耶穌，懇爾納我於聖心中，俾得生於爾心，死於爾心，永遠不離爾心。

聖心祭獻 第五日

定像 想見吾主聖身，懸於十字架，聖血淋漓。聖心則獻已

苦難於聖父，求救衆人之罪。

特求 求主默照我心，賜我仰法聖心之祭獻。

撮意 初思，聖心在世祭獻。繼思，聖心在聖體中祭獻。終思，

吾人如何祭獻。

初思 吾人獲罪於主，自應捨生以息主怒。但卑微人命，不

能補無限重罪。故耶穌自爲祭品，代贖愆尤。聖保祿

云、耶穌甫入世、向聖父曰、主不欲犧牲、而與我肉體、按經首所書、予今來奉主命。由是以思、吾主降孕之初、卽將身心性命、與一生困苦艱難、全獻於聖父。自是以往、居母腹、臥馬槽、家居納匝肋、周行如德亞、直至身懸十字架、發七言而終、吾主聖心、未嘗不獻功於聖父、求赦人罪。我主嘗告聖女瑪加利大曰、吾在世時、生於愛、溺於困、自作犧牲、祭獻聖父。然則吾主流血之祭、惟成於懸架之時、而其祭獻之意、實始於

降孕之初。吾罪人自朝至夕，所作所爲，亦思上獻天主，補贖往愆耶。噫，未也，我喪失多矣，今而後將翻然改圖矣。

繼思

吾主立聖體大禮，永留聖教中，不分畛域，今昔無殊，凡教士所在，卽聖體所在也。然聖體日日於祭臺上，時時於聖櫃中，聖心果何所思哉。要惟恒獻身靈，平息主怒而已。噫，聖心之祭，馨也，飴也。昔梅爾基瑟以麴酒祭主，上主享之。况聖心所獻，乃至尊聖體，無價

寶血乎。聖伯爾納多、自忖無功、奉獻聖心於天主。耶穌嘗親諭聖女日多達曰、吾心爲聖三之樂、交付汝、爲補汝虧缺。噫、幸哉、聖心爲贖罪之資、復有何罪不可贖乎。予一生多過、應受重刑、然仰賴聖心、求主憐宥、必能得所求也。

終思

聖心全獻於主、其所望於吾者、亦惟全獻無遺也。聖女瑪加利大謂欲修全德、仰合聖心、必先奉獻神形、及諸所有。凡事隨主寵照、一舉一動、思愜聖心之意。

境無順逆，恒思讚頌聖心。直至私意盡泯，神魂潛入
聖心中，乃可大顯聖心之榮耀。吾返躬自問，去聖女
之明訓遠矣。自今立志，除絕偏私，不顧一己之利害，
不隨私意之從違，惟求仰合聖心，顯主尊榮而已。

聖心愛主第六日

定像。想見耶穌在世，聖心仰契聖三，時發熱愛之情。
特求。求主燭照吾靈，使知聖心之愛。又求多賜聖寵，灼熱
吾心。

撮意。初思，聖心恒愛。繼思，聖心純愛。終思，聖愛之實效。

初思。聖心受造伊始，其初念卽愛聖父。自是以往，無時或
間，念念不忘。一生之外行有殊，內念之熱情不易。今
聖心在天堂上永遠熱愛，宛若光明一炬，炎炎於聖

父之前。噫，聖心之愛，最悅聖父之心者也。雖然，天主所欲得於我者，非亦愛歟。天主於聖經曰：小子，獻我爾心。又曰：全心愛爾主。凡此經訓，皆諭人熱愛天主也。無如世人私意縈懷，分心俗務，萬事皆出入心中。惟愛主一事，鮮能念及，可不傷哉。吾反心自問，亦復如是。今痛悔前非，學聖奧斯定自悔，愛主之已遲。聖伯爾納多有云：純善之愛，不求恩報。聖心愛主，惟思天主之妙，天主之尊，未嘗以貪戀之情，稍雜其念。

繼思

吾主云。我不求榮。惟求遣我者之榮。又曰。我苟求榮。予榮烏有。然則聖心只求榮天主。而不求榮己也。聖女瑪加利大。曾見聖心在純愛火中。諸天神環立歌詠曰。斯愛勝兮。斯愛得兮。聖心之愛。安且樂兮。吾靈思之。愛主之情。純乎否乎。昔聖依納爵只求愛主。別無他求。吾心所望。豈其然哉。求主清潔吾心。盡絕自私之意。乃可。

終思

聖依納爵謂寔愛驗於與授。卽以己所有與於所愛。

之人也。聖額我畧亦云，徒愛無行，非愛。聖心之愛，發於寔行，見於事蹟，一生動靜言爲，行奇論道，無一非愛主之徵。至受難時，聖愛更切。故山園祈禱後，耶穌謂徒曰：起往矣，使人知我寔愛聖父也。又思聖心於聖體中，受人萬般凌辱，始終含忍，此非聖心有求於人，實以愛主至切，而欲補其辱，顯其榮耳。吾自省所爲，實未能全愛天主。聖奧斯定曰：愛者不勞，如勞，卽愛其勞。吾靈愛主，果如是耶。

聖心恃主 第七日

定像。想見吾主，逃往厄日多國，地險機危，聖心坦然如故。
特求。求主啟我明悟，賜我常恃主慈，不復遇艱慮亂。
撮意。初思，聖心恃主之表。繼思，人當恃主之故。終思，依恃
聖心之益。

初思。以耶穌人性而言，德能有限，亦須賴主扶持，故聖心
依恃聖父，須臾無間。達未代主預曰，予自母胎，托付
於主。又曰，予諸境遇，盡在汝手。耶穌被釘將終，曰，吾

主我神付於爾手。試觀吾主沖齡、逃避他國、厥後隱跡家鄉、資用乏絕。又後出傳聖教、歷盡辛勞。又後備受艱難、至於釘死。聖心一意恃主、終無憎憤之時。吾自思之、稍有拂意之遭、卽怨心生而灰心起、不能含忍於心。噫、我過矣、今而後願仰法聖心矣。

繼思

天主生造吾人、不惟保存養育、且時時事事、顧復扶持。事無吉凶、境無順逆、或由主旨而來、或因主准而至、皆所以裨益我靈、從未有出天主意外者。吾主嘗

云、草木之微、大父必存之、况爾輩貴於草木者乎。又曰、大父知爾所需、務求天國、他物自施汝。又曰、爾首之髮、已計數矣、無大父之意、一髮不能下也。凡此經訓、明徵天主愛人、愈於慈父。災難貧病、人害魔誘、無一非天主欲之、無一非天主准之、無一非利我靈魂、助我行天路。故聖依納爵喟然曰、主知之、主欲之、何懼之有。吾於此豁然自醒、以後不復多慮矣。

終思 達未王有云、恃主、遠勝於恃人、可知恃聖心、遠勝於

侍人。蓋聖心、天主之心也。其愛人至極，不待求而先錫寵恩，豈有恃其仁而反虛所望乎。吾主嘗告聖女日多達曰：人若於被難時，依恃我仁，切望我救，此意大動余心，遂致分其憂，而天上萬福亦不能慰我。時或坐視其厄，不速救援者，非不欲救，實欲增其恒禱之功耳。聖女默底達嘗代一修士求主，主告曰：虔敬聖心，則所求必獲矣。噫，幸哉，依恃聖心之效，如是其神且速也。世人盍依賴聖心，而不復皇然若失乎。

聖心恒禱 第八日

定像 想見吾主獨處山林，祈求聖父。

特求 求主示我善禱之則，至死不輟祈禱之功。

撮意 初思，聖心恒禱之表。繼思，聖心善禱之則。終思，祈禱

聖心之益。

初思 耶穌在世，聖靈常見主性，故聖心祈禱聖父，須與不輟。夢寐無間。雖然，吾主仍有誦禱之時，示人以祈禱之要。方居家時，稍有餘閒，輒往求主。將出傳道，四旬

嚴齋、日夜祈主。傳教時、屢次登山、終宵默禱。將受難、憂苦愈深、懇禱愈久。今聖心在天及在聖體中、亦時時代人轉達、哀懇聖父霽威。然則聖心之禱恒且切也、無間隙之時也。耶穌真主真人、尙恒禱如是、况我微賤罪人、反可自恃已能、不求聖佑耶。

繼思

聖心所求、皆榮主救靈之事。求榮聖父曰、爾名見聖、爾旨承行。求免苦難曰、如可免、求免苦爵、然成爾旨、勿從余意。既擢伯多祿爲宗徒長、祈聖父堅其信心。

憫世人不識眞主，墮陷地獄，則求主賜人識奉眞主，及其所遣基利斯督。吾靈思之，平日所求，亦爲榮主救靈耶。曾爲親友恩人，及外教人求耶。曾爲煉獄靈魂，臨終罪人求耶。噫，我心冷淡，何愛己愛人之淺也。耶穌諭徒曰，恒禱勿輟。又曰，人苟專志堅信，未有求而不應，尋而不得，叩而不啟者。夫叩何人之門乎，叩聖心之門，無求不得也。聖女日多達曰，余蒙聖心之恩，多不勝計，筆舌不能宣。聖女默底達云，如欲以聖

心之恩，盡筆於書，非一卷一帙所能詳載。聖女瑪加利大亦云，聖心顯現之意，欲啟己恩庫，施與我人。然則聖心中無恩不備，無福不盈，吾將哀懇而得之。

聖心愛親 第九日

定像 想見吾主沖齡，偕瑪利亞若瑟同居一室，彼此相愛至極。

特求 求主賜我寵照，能悟聖家互愛之情，并賜我恭事聖家，終身不怠。

撮意 初思，聖心愛親。繼思，聖心順親。終思，聖心別親。

初思 聖路加紀牧童往拜聖嬰，見瑪利亞若瑟與在。噫，斯言也，何詞簡而意深也。蓋吾主與二聖，一意同情，相

親相愛、多年聚首、永遠不違。吾主小時、依依二聖膝下、頃刻不離左右。視其舉止、聽其言語、任其指使、受其扶持。聖心之懷愛二聖、非上品天神所能測量。但吾主既愛二聖、必願吾人同敬二聖、方合聖心之意。故懸架將終、猶指聖母謂若望曰、此乃爾母。蓋欲人敬事聖母、無異生母也。聖母嘗謂賢女大克來大曰、惡人下獄、永悔其生前未敬若瑟。然則恭敬二聖、實人生至要事也。我今何如。

繼思

天主第四誡，命人孝敬父母。孝敬之責，首重順親。聖心於此，亦曾樹表示人。加納地有新婚者，耶穌與聖母同往寵之。席間乏酒，耶穌以聖母之請，變水爲酒。聖伯爾納多嘆曰：異哉聖母之權，不特受造者服其令，而造物主亦行其旨也。吾靈於此，蓋亦倍切虔誠，仰賴聖母與若瑟。按前聖之意，二聖求耶穌，宛有諭令之力，而所求無不得也。

終思

聖心既愛二親，豈不以聚首家庭爲快。然凡行聖父

之旨，必遠別其親，毫無眷戀。年方十二，獨留聖殿，顯主尊榮。二聖三日尋求，不勝悲痛。年方三十，出傳聖教，與聖母兩地相睽，未聞屢屢歸省。此無他，示人承行主旨，不可過順親心也。吾主又云，不離父母昆弟，不得爲吾徒。今吾返心自問，蒙主諭召，或棄家修道，或遠出救靈，或別行善事，萬不可以順親之故，逆天主意，而貽後悔也。

聖心聽命第十日

定像 想見吾主、與聖母若瑟同居、每事請命、承順弗違。

特求 求主賜我寵佑、俾克仰法聖心之順命。

撮意 初思、聖心聽何人之命。繼思、聖心聽命於何事。終思、

聽命有何益效。

初思 聖伯爾納多曰、人無私意、地獄可虛設矣。此言世人

犯罪、自取永殃、皆以違命所致。無私意、即無罪、而地

獄虛矣。昔原祖以逆命禍世、今聖心以順命贖人。吾

主云。承行遣我者之旨。卽爲我日用之糧。但聖心不特聽聖父之命。然亦聽聖母聖若瑟之命。經紀耶穌幼行曰。渠屬伊等權下。言吾主日用飲食。洒掃周旋。無一非請命而行。無一非聞命而止。今吾主在聖體中。常從司祭之意。南北東西。惟命是從。噫。耶穌爲真天主。尙服從人命。我大罪人反敢不從命。何其傲哉。

繼思

聽命不難於一時。而難於時時。不難於一事。而難於事事。聖心順命。始終無間。難易無殊。事之尋常者聖

心聽命。事之勞苦者。聖心亦聽命。事之榮顯者。聖心聽命。事之艱難者。聖心亦聽命。耶穌自言曰。凡合聖父意者。余恒守不違。聖保祿謂吾主順命至死。且死於十字架。吾主臨終時大聲曰。畢矣。言一生聽命。至此而畢矣。噫。吾之聽命。豈其然哉。

終思

聖經言聽命之美曰。聽命愈於祭品。言聽命之效曰。順命者可談勝捷。猶言聽命之德。最悅天主心。故聽命之益。極大且多也。吾主嘗告瑪加利大云。余以聽

命捨生，不順命者，不能悅我心。聖經云，汝何呼我爲主而不遵我命，欲升天國，頻呼吾主，不能濟事。由是以推，聽命乃升天之梯，進德之徑，悅主之行，吾靈其戒之。

聖心愛人 第十一日

定像 想見吾主，謂聖女瑪加利大曰，汝視此心，如何愛人。

特求 求主感激吾心，俾得仰體聖心，還愛聖心。

撮意 初思，聖心愛人之切。繼思，愛人之久。終思，愛人之效。

初思 聖心愛人，猶父之愛子，友之愛友，兄之愛弟。故古經

上天主曰，余爲依斯爾民之父。耶穌受難前夕告宗徒曰，今而後吾不稱爾爲僕，而稱爾爲友矣。復活後論聖女瑪達肋納，往報昆弟，卽宗徒是。聖保祿亦云，

天主聖子不愧稱人爲弟。由是推之，吾主愛人無微不至，奚啻骨肉相親，肺肝相示。但聖心愛人深切，人罕有思之者。故吾主告聖女瑪加利大曰，汝視此心，如何愛人。噫嘻，吾主，爾情如醉，爾愛若火。吾心寒冷似冰，不知報愛。求爾賜我聖寵，化我梗頑。以爾愛情之箭透我心，愛情之味飫我心，愛情之火熱我心，助我克絕偏私，永遠燔炙於聖愛。

繼思 聖心愛人，終身無間，悠永無疆。自受孕之初，即以萬

民藏心內。厥後幼而壯，壯而被難至死，無一時不愛人，無一時不思救人。聖若望紀耶穌被難事曰：主愛所屬之人，至終愛之。猶言吾主一生慈愛，將終則愛更切矣。今聖心在天，亦時常愛人。聖女日多達見聖心有二動焉：一爲求聖父寬宥罪人，一爲求聖父俯佑善人。聖女加大利納，一日近主胸前，見聖心中火燄上升，表其至愛。嗚呼耶穌，爾心愛我至切，而我忘情若是，負愛若是，我寔抱咎，愧悔無地。仰求助吾弱。

熱我心，庶不復辜恩於他日。

終思

聖心愛人，無恩不備，無苦不承。降生以拔人性，立德以示人型，傳道則示人奧意，贖人則捨己生命。猶恐扶持不力，難振委靡，因復以聖體聖血涵養人靈，又以他聖事助人神力。噫，聖心愛人，尙有何事未爲哉。世人之愛，莫過於代友授命。聖心之愛，不特代人死，而又以己體養人靈，愛何如乎。吾靈當知恩報愛，不復忘棄聖心如此。

聖心憐罪第十二日

定像 想見吾主在世，與諸罪人，言語溫和，慈祥外著。

特求 求主賜我認識聖心，倍增依恃聖心之慄。

撮意 初思，聖心憐罪人。繼思，聖心化導罪人。終思，勸化

罪人，最悅聖心。

初思 吾主在生，與罪人言語往來，最爲快意。一日宴於瑪

竇家，或竊厭之。耶穌曰，醫醫病人，無病不求醫。發利

塞欲擊斃淫婦，耶穌憫而護之。聖女瑪達肋納素守

不潔，一日淚滌耶穌足，聖心感動，盡宥其往愆。聖身懸架將終，右盜一言求宥，吾主全赦其罪。嗚呼聖心，爾仁無量，爾愛靡涯。吾大罪人，仰望垂憐，佑我改悛。繼思

聖心爲人主保，恒獻聖傷於聖父，用息聖父之怒。或求聖父賜聖寵於罪人，或以天上尊榮，動罪人之願望，或以身後永罰，醒罪人之昏迷。總之默感潛通，循循善誘，直至挽回罪人而始快。吾自省之下，亦有習犯之罪，聖寵迫我改遷，已不知幾何次，而我拂逆依

然噫。恒逆聖心。終將見棄。可不畏歟。

終思

吾主嘗謂一人悔改。衆天神皆悅。聖心愛人。愈於天神。則罪人改過。而聖心喜悅。更可知矣。經紀蕩子歸家。厥父極形喜樂。此喻聖心之悅人悔改也。由是以推。人欲悅聖心。莫如勸化罪人。而勸化之法。又莫如代懇聖心。聖女默底達嘗見一人在聖心中。擊金粉碎。以明心硬如金。亦可被化於聖心。夫然而罪大惡極之人。亦不可因其惡。而不爲之代禱。吾靈其勉之。

聖心良善第十三日

定像 想見吾主在世，與人往來，良善可親。

特求 求主賜我仰體聖心，法其良善之德。

撮意 初思，吾主良善於心。繼思，吾主良善於言。終思，吾主

良善於行。

初思 主於聖經曰，爾宜則予良善。從知吾主之心，馴良可

愛，溫厚和平。雖異學士，僞善釣名，犯罪人沉迷不返，

聖心一意慈祥，絕不忿怒。一日，宗徒求降天火，焚滅

頑仇。主責曰、爾不知自具何心。猶言人當和愛、不可相憎也。吾自省之、亦不合於聖心之表。待人多妄斷、交際多厭憎。噫、聖心純美無瑕、尙涵容如是、我一善不具、反褊急若斯、豈理也哉。

繼思

經有云、口中言語、出於心之所充。然則聖心良善、而聖言亦良善審矣。以吾主平日言之、十二徒愚蠢異常、發利塞驕矜特甚、聖心始終隱忍、嗔眦不形。或不得已而明斥其非、總不失溫良之度。至受難時、慈善

更昭、誣之不辨、擊之不怨、如羔羊於剪毛者之前、並不啟口、以鳴其痛。吾自思之、迴不其然。細故必爭、小辱不容、必欲勝人而後已。噫嘻、吾實乖戾、深愧於聖心之前。

終思

吾主一生事蹟、仁善特昭、先知士預稱爲慈善之王。聖弟阿尼削謂吾主少時、隣居童幼輩相告曰、盍往觀溫良耶穌。聖瑪竇紀時人稱耶穌爲罪人之友。先知謂其不裂枯荻、不滅殘燈。皆言吾主仁善超倫、未

嘗一舉手以損人，亦未一舉足以害物。今吾主在聖體中，謙忍至極，寬恕至極，雖受萬般凌辱，總不顯形降罰。嗚呼！吾靈，汝見吾主溫和至此，尚敢盛氣待人，厲聲斥人耶。

聖心愛靈 第十四日

定像 想見吾主與諸聖徒，周行佈道，隨處行奇，萬分慈愛。

特求 求主賜我聖寵，俾得步主後塵，勸導人靈歸化。

撮意 初思，聖心憂靈。繼思，聖心救靈。終思，救靈之功。

初思 耶穌聖心愛人至極，念念不忘。一日告宗徒曰，余爲

善牧，尙有他羊未入我棧，將往收之。所謂他羊者，外
教人之靈也。吾主愛之，欲其咸歸正教，而始慰於心。
又一日，見民衆失教，告弟子曰，穡事可穫者多，收穫

者寡。爾輩亟求稽主，遣人收之。稽事非他，亦指世人之靈，因其與世浮沉，無人導引，故聖心傷之。厥後懸架將終，身神極疲，猶高聲曰：余渴。嗚呼！吾主，爾渴維何，豈不知惡人將飲爾以苦胆乎？噫！吾知之矣。非特口渴，更渴想人靈，而欲援救之也。

繼思

聖心愛靈之切，可駭以外行。吾主自幼至終，立功救世，躬親勸人。未誕前，往若翰家赦其原罪。既降誕，默導三王，使知奇奧。年甫十二，講論於博士之間。年至

三十傳道於如德亞國。或登山訓真福八端、或下舟
慰相擁之衆。其於談論間、語言真切、意義淵深、舉止
端莊、容顏和悅。誠以愛切於中、而慈著於外、非口舌
所能形容也。又想吾主當日、獨坐井旁、乞水於淫婦、
其撝謙之態、善誘之方、何其慈歟。嗟乎吾靈、聖心愛
靈如是、盍亦化導人靈、以悅聖心之意。

終思 救靈之故不一而足、茲特以三者言之。一、靈魂爲天

主所造、肖似天主之像、又爲耶穌寶血所贖、價值無

窮。聖格利瑪谷曰：天地萬物，莫比一靈之值。然則救靈之功，至高至美者也。二人靈既爲吾主所贖，救靈之功，必悅聖心之意。聖第阿尼削云：救靈愈於復活死人。蓋復活死人，不過活其肉體，他日仍當入土。救靈則擢之天國，享福無窮，榮主莫大於此。三、救靈之報，遠勝他功。聖雅各伯曰：勸人改悔，必蒙赦罪。古經云：化導多人於義，永遠光耀如星。然則救人靈，即所以救己靈。吾自思之，迄今素行何如，日後當行何事。

聖心憫困 第十五日

定像 想見吾主周行如德亞、凡遇貧病諸人、莫不慨然救助。

特求 求主賜我認識聖心、倍切依恃之意。

撮意 初思、聖心憫肉身之困。繼思、聖心憫心神之苦。終思、聖心願人濟困。

初思 吾主傳教三年、所行靈蹟甚多、茲特以最著者言之。
一人病痿三十八年矣、吾主見而憐之、命携榻以歸。

途遇矇癩諸人，高聲求救，或人阻之，聖心不忍，招之來前，還復其明。有負魔者至耶穌前，聖心大爲愷惻，立即驅逐邪魔。五千人聽道乏食，吾主憫之，遂以五餅二魚，飽飫衆人。宗徒航海遇大風，相顧驚惶，吾主亟往救援，命風平息。種種靈異，莫計其數。聖伯多祿曰：吾主隨所往，必加恩澤。聖若望亦云：如欲以吾主事蹟，盡筆於書，世上無可容之地。此言吾主聖蹟之多，亦以見聖心憫困之深也。

繼思

心神之苦，較疾病之苦爲尤甚，故聖心憫之，亦有加焉。途遇一婦人，哭子殤亡，異常哀痛，聖心爲之動，立命死子復生。聖女瑪爾大姊妹，因兄辣匝祿死，大慟，吾主見之，聖心感觸，爲之垂淚隕涕。吾主見世人昏昧，尤加惻隱。受難時，數婦人流淚隨行，耶穌回顧曰：勿哭子，應哭爾曹及爾曹子孫。一日行近日路撒稜，望城揮淚，悲痛良深。無他，因彼都人溺於罪過，將受重罰，吾主不忍坐視也。嗚呼，至尊聖心，愛人至極，吾

罪人心常剛忍，可不痛哉。

終思

吾主將受難，謂諸宗徒曰：小子，予有新命與汝，汝輩宜相愛。相愛非他，卽竭力拯救人也。因聖心愛人至切，凡吾施濟他人，與施濟耶穌無異。公審判日，主謂善人曰：曩者余飢，爾食我。我渴，爾飲我。我旅，爾舍我。我裸，爾衣我。我被虜，爾贖我。我病或居牢，爾訪我。顧我。又曰：爾輩施於斯小子，卽施於我。由是觀之，救人。不啻救主，安可坐視其困，而不力救之哉。

聖心愛仇 第十六日

定像 想見耶穌釘於十字架，求聖父寬宥其仇。

特求 求主默照我心，稍識聖心之慈愛。

撮意 初思，愛仇之表。繼思，愛仇之命。終思，愛仇之報。

初思 吾主訓人必先立表，於愛仇亦然。茹答斯負責賣耶穌，唇親聖面，吾主稱之曰友，蓋欲挽其心，救其靈也。瑪爾高執耶穌，伯多祿抽劍削其耳，亦咎有應得，然聖心憐恤，撫而療之。如德亞人備受主恩，反釘之於十

字架。聖心不棄。且求聖父救之。嗚呼。吾主。爾仁無量。爾愛靡涯。我一生多罪。常違爾誠。常負爾恩。爲爾之仇。甚於凡衆。今求恕我往愆。賜我不復違爾聖旨。

繼思

吾主愛仇之命。聖經紀載甚詳。主云。人或批爾右頰。當以左頰俟之。人與爾爭訟。奪爾長袍。更以廠衣授之。人強爾走千步。與之走二千。需索則與之。告貸於汝。亦勿却。又曰。仇爾者愛之。惡爾者惠之。誹爾詈爾者。爲其禱安吉。妄証窘困爾者。求主降福於彼。噫。吾

終思

自省之，微寃不忍，小恥難忘，不合主訓多矣。

愛仇恕辱，爲救靈至要之功。耶穌曰：若爾弗恕昆弟，在天我父亦弗恕爾罪。聖奧斯定嘆曰：主言若雷，直貫罪人之耳。主與吾宛相訂約，吾恕人，主亦恕我，我不恕人，主亦不恕我。夫愛仇非易，福報奇大，可爲成聖之基，升天之兆，亦可消滅罪罰，多受寵恩。則凡積怨不釋，懷恨不忘者，非有害於人，而實自害深也，可不及早圖之。

聖心貞德第十七日

定像 想見吾主於馬槽中，貞淨端莊，遠超神聖。

特求 求主特賜神光，使我仰羨清貞，至死不犯大過。

撮意 初思，貞德之表。繼思，貞德之尊。終思，守貞之法。

初思 耶穌爲真天主，何愁俗尙之累已。雖然，吾主一生，謹言慎行，猶白圭之防其玷染。如德人誣以謀叛，詈爲醉徒，控爲僞主，詆爲負魔，種種毀辱，累萬盈千，然從未誣主有乖貞德。此何以故，因吾主戒慎至密，無影

可捕也。吾主於講道時，屢屢評章，推重貞德。曾言貞之難曰：非人人能悟，必自上主賜之。言貞之要曰：宜束腰持燭，如僕人待家主夜歸。孰是說也，人無論修道與否，各宜謹小慎微，勿使邪魔有誘引之資乃可。

繼思

聖巴西略言貞德之貴，謂潔身者肖似天主。聖伯爾納多謂天神與貞人，異於福，不異於德。聖若望神遊天上，見守貞者密邇天主羔羊，卽耶穌是。從知守貞之人，近侍我主，較他聖人更榮耀於天。吾靈思之，果

能清潔如天神耶。倘白圭有玷，豈不遺憾終身乎。雖然，已往難追，未來可及，今矢志自勉於將來。

終思

貞德既美，防之宜嚴，否則失之甚易也。防守之法，在恒心求主，切禱聖母，托賴主心，多領聖事，慎守五官，杜絕穢念等。經云：死者，罪也。窻者，目也。猶言顧盼不慎，穢念即生，神魂之生命由是亡也。外此，則遠避罪機，慎擇交友，淡泊持齋，滅除慾火。能如是，則神力有加，貞德可保矣。

聖心誠樸 第十八日

定像 想見吾主沖齡，與童穉輩往來交接，誠樸可風。

特求 求主賜我悟聖心之誠樸，師法於言行之間。

撮意 初思，誠樸之表。繼思，誠樸之要。終思，誠樸之益。

初思 聖保祿謂耶穌肖似世人，斯言特於誠樸驗之。蓋其
髻齡恂恂，遠勝凡童，從未以才智臨人，雄談驚衆。心
專榮主之事，志切愛人之念。一切是是非非，形形色
色，皆不關於懷。終身敦厚，事事率真，故時人目爲梓

人子、不識其爲真主真人也。吾自省之、余心之虛僞極矣。飾善文過、好譽求名、妬人之善、恥己之惡。種種雜念、擾亂於心。幼時安和之福、早已失之、噫嘻。

繼思

聖心真寔無妄、痛絕虛浮。古司教僞善欺人、吾主直言斥責。一日撫嬰謂徒曰、不學孩提、天國莫入。遣徒傳教、則曰、爾宜誠樸如鴿。然則志在精修者、不可不致力於斯。誠於心、不怨不尤。誠於口、無謊無侮。誠於行、絕無矯飾之舉。苟如是、可謂誠實之人、天主悅之。

終思

誠樸之益，特見於三。一、誠樸者，爲天主所寵，故耶穌誕後，天神獨報牧童，示知奇奧。將傳教，特揀十二愚夫，助傳聖道。二、誠樸者，爲成聖之基。聖基所曰，進德之路，誠樸而已矣。經云，天國隱奧，不示聰慧人，而示卑微子，卽此意也。三、誠樸爲安福之源。蓋務實者，不干聲譽，不求人知，隨遇而安，心無煩慮。聖額我略謂，言行之實，乃安福之根。由是思之，人欲見寵於主，安樂於心，非歸真返樸，不爲功。

聖心安靜第十九日

定像 想見吾主復活後，顯於諸宗徒，祝其安福。

特求 求主賜我聖寵真光，能知聖心安靜之德。

撮意 初思，聖心之安。繼思，聖心之靜。終思，安靜之由。

初思 聖奧斯定謂秩然有序之謂安。凡序之所在，即安之

所在也。吾主念念有序，言言有序，動靜起居無一不

有序。先知依撒依預言吾主神情不亂，昏憤不形。據

是言也，吾主一生，從容端雅，無旁皇失次之時，經紀

耶穌講道，民衆不解其義，欲投之深谷中，吾主泰然
隱跡，無亂於心。被難時，萬苦齊集，吾主身受之，而心
地坦然。我乃分心瑣屑，注意浮華，慮難憂危，思前顧
後，宛如海水之沸騰，總無凝靜之一日，可不惜哉。

繼思

吾主聖心，不特安和立表，而且沉靜示型。家居時，手
不停工，日無暇晷，然聖心結契聖三，從未分念。行路
時，風塵僕僕，應接不遑，然聖心旨意安閒，總不雜亂。
談道時，有問必答，見過輒規，然聖心鎮靜自若，防閑

常密。更觀吾主於聖體中，終朝寂寞，長夜蕭條，聖心之淵默，豈特千百年而已哉。嗚呼吾心，雜念叢生，馳志分外。求主納我於聖心中，俾得常聽聖言而不怠。終思欲法聖心安靜，必先慎守五官。目不妄視，口不易言，耳不輕聽，身不妄動。又須防檢心神，毋使放縱。守記司，勿憶無裨之事。守明司，勿生非分之念。守欲司，勿作意外之求。守像司，勿存非理之像。如是，則外誘泯而內念善，此心安靜不搖矣。

聖心謙遜第二十日

定像 想見吾主濯宗徒足，立謙遜之表。

特求 求主賜我真光，得悉聖心之謙遜。

撮意 初思，聖心謙遜示表。繼思，謙遜見於何事。終思，謙遜有何益效。

初思 或問吾主至尊，曷容卑下。子曰，謙遜固不合天主之尊，然以耶穌人性而言，自無而有，受造於主，亦當謙遜。按聖經意，萬民之罪，吾主代負於身，故聖心自信

卑微抱慚無地，無異子之過，遺譏於父，弟之惡，移恥於兄。職是之故，吾主卑以自牧。幼時割損，壯而受洗，親濯宗徒足，甘受辱架刑，皇皇天主真子，竟與罪人同流。今在聖體中，聖心謙抑尤深。嗚呼吾主，爾榮何在，爾尊何在，爾全能何在，主性何在，何以無窮大主，竟隱藏於麪酒形下也。吾罪人出自泥土，一能未具，百拙有餘，反敢驕矜若是，亦可痛也已。

繼思 主云，子心謙下，爾曹則之。然則聖心之意，欲人持法

其謙。但謙遜不在虛文，而在實行。認己之微，知己之惡。聞過則喜，聆譽則憂。受侮不怨，見慢不愠。長命是從，不隨私見。樂道人善，惡稱人惡。有善則歸榮於天主，有過則歸罪於一己。總之謙遜人甘受恥辱，直欲彷彿聖心而後已。然吾自思之，去謙遜之真德遠矣。祈主加我寵恩，稍法聖心之謙退。

終思

經云，主黜尊者於高位，而陟舉夫謙遜者。則謙遜乃諸德之根，衆善之源。舍此，功無由立，寵無由得，萬事

皆虛妄耳。吾靈思之，多罪耶，謙以求救，主必救之。力弱耶，謙以求佑，主必佑之。欲榮主救靈耶，惟謙於心，則主榮於天，人安於地。欲積德立功耶，惟謙於心，則聖寵日增，偏私日減。欲善死升天耶，更非謙遜不可。蓋自下者被陟，經訓昭然。故驕傲者，萬不能升天國。思念及此，不禁痛心慘悔，戰戰自懼矣。

聖心輕世第二十一日

定像 想見吾主潛居一室，脫然於世俗之外。

特求 求主賜我輕視世物，一心常向天主。

撮意 初思，聖心輕物。繼思，聖心隱跡。終思，聖心避榮。

初思 吾主自生至死，身雖在世，心寔在天。忘懷勢利，絕念

浮華，不求居處之安，不求衣食之美。爲主愛物，因物愛主，此外無關懷之事。聖保祿云，用斯世一如未用，此意惟吾主盡之。吁，吾可愛之耶穌，爾心靈智，不爲

世惑。今求爾賜我寵光，亦能輕棄世物。夫世物固何足重哉。萬事遷移，無異駒影。才人志士，不久歸灰。財貨豐姿，未幾化土。人所以眷戀世物，皆以不思故耳。願吾靈反復思之。

繼思

眞能輕絕世榮者，不求知於世。吾主生於草舍，長於下邑，一生隱跡，托技藏身。聖若翰向衆曰：主在爾中，爾未之識。蓋吾主自甘潛伏，不顯其能，故當世視爲庸常人也。吾自思之，豈其然哉。勤於務外，倦於藏修。

沽名干譽，常欲人人稱美。噫，吾之愚昧，何竟如是。今而後將謹遵經訓，與基利斯督同隱於主前。

終思

吾主聖心，痛絕世榮。凡愈聾瘖諸人，每戒其勿露，蓋以遏名譽之來也。負魔者頻稱耶穌爲天主子，吾主禁邪魔勿言，以免旁人之稱讚。一日民衆感德，欲推爲君，吾主遠遁避之。有分產不決者，折中於主，主曰，孰使吾爲判吏，而析汝產也。按吾主遠絕世榮，置身俗外，特欲爲修道守貞者示以準則，吾其奮力效之。

聖心甘貧第二十二日

定像 想見吾主誕生後在馬槽中，飢寒交逼，困苦萬分。
特求 求主賜我真智，樂居貧賤之地。

撮意 初思，神貧之表。繼思，神貧之要。終思，神貧之益。

初思 聖保祿曰，貪爲衆惡之根。蓋旣貪矣，則貧而諂，富而驕，取不以義，謀不以道，種種罪過，由是發生。耶穌欲破其迷，先立甘貧之表。生於馬槽中，衣食無資，逃往日多國，棲身無地。家居十八載，作梓匠工，爲餬口計。

傳教三年，賴人周濟。被釘十字架，衣褐無存。正合吾主所云，狐有穴，鳥有巢，人子無枕首地。噫，耶穌富有萬物，而一貧至此，果何爲乎？吾靈可不體而法之。

繼思

吾主知勢利之害人不淺，故訓人樂貧厭富，往往而然。嘗嘆富者之危曰：爾富矣，貴矣，安且飽矣，惜哉！將必有飢渴時也。又曰：駱駝穿針尙易，富人升天實難。然則有財者可不惕惕自驚哉！又示神貧之則曰：勿積錢貝，勿儲多糧，勿携衣履。吾也，居必求安，財必求

足食必可口，衣必章身。雖或幸免大過，然迥不合神貧之德。今默想主訓，不禁自愧於心，將慎之於將來。

終思

俗人不知神貧之樂，反謂粗衣淡食，誰能堪之。豈知神貧之士，富於德，富於功，富於寵恩，默感心樂神怡，較之斯世塊然之物，奚啻天壤相懸。况離俗從主，必得常生。故神貧非貧，乃真富也。聖保祿曰：一物不具，萬事無虧，斯言可為神貧者道之。吾靈貪欲未除，多所羨慕，斯真貧於身，兼貧於心，亦大可惜已。

聖心刻苦第二十三日

定像 想見吾主嚴齋四十日，聖容憔悴之至。

特求 求主加我聖佑，忻羨苦工，力行不倦。

撮意 初思，刻苦之表。繼思，刻苦之要。終思，刻苦之益。

初思 前賢謂吾主終身致命。誠以吾主刻苦功深，無異時常致命也。試思其降誕時，擇寒冬之夜。既生後，受割損之痛。三十年服勞淡泊，四十日苦禱嚴齋。傳教則跋涉艱難，受難則傾流寶血。然吾主盡善無玷，何必

苦身若是。惟以世人多罪，皆喜行樂，故吾主立表於前，令人隨踪於後耳。吾罪人稍知報德，可不仰法聖心，樂行克己之功哉。

繼思

主於聖經曰：人若不憾其生命，不得爲我徒。又曰：誰願從我，須日負其十字架。十字架者，日常拂意之事，如災害凌辱，貧困飢寒，疾病憂傷，偏情慾火，魔誘心灰，力疲神焦，謗讒冤誣等皆是。種種逆境，何日無之，是爲我不得不行之苦功。但志在進修者，尤當分外

加功、苦身克己、粗衣淡食、鞭體嚴齋、絕無裨之逢迎、
杜非分之意想。如是、則德日修而功日立、未幾可造
德詣矣、

終思

刻苦之益、可約之以五。自元祖獲罪以後、人之私慾
殊多、難於避惡。惟苦身、則理勝慾、神勝形、不難守誠
行善、一益也。聖經云、必持齋、乃爲善禱。是言徒禱無
苦、難動主慈。必飢寒自困、求主矜憐、則易蒙主允、二
益也。吾主愛人至極、歷盡艱難。人能苦其身、稍顯感

恩之意，必悅聖心，三益也。罪無大小，有犯必償。天主造煉獄，爲補未受之罰，然煉獄之苦極大，不如在世補贖爲易，四益也。聖保祿曰，今時之苦，莫比身後之榮，言在世忍苦，可增天堂之福，五益也。據是以思，刻苦乃人生至要事，吾其勉力行之。

聖心堅決第二十四日

定像 想見吾主，逐貿易者於聖殿。

特求 求主啟我明悟，得識聖心之果決。

撮意 初思，聖心堅於規過。繼思，聖心堅於拒誘。終思，聖心

堅於忍苦。

初思 聖心汎愛靡遺，慈祥逾格，然使罪人迷於惡，不知返

悔，吾主亦直斥不諱也。當時宿學士與司教諸人，驕

矜滿志，文過欺民，吾主直斥其非，比之於棺槨。異學

士謗宗徒摘麥充飢，吾主責其妄議。一日登聖殿，見貿易者褻穢堂廡，吾主揮鞭逐之。異哉，吾主至仁無量，而亦有此威怒時也。蓋訓人有規過之責者，不可袖手旁觀，任人迷謬。但規過有序，先之以愛，繼之以厲，不可冒昧從事。吾自省之，不亦荒於職，而有愧於心耶。抑或屢入聖堂，每多失敬，而當見責於主耶。

繼思

凡人被誘，往往拒之不力。吾主躬親受誘，以示勇敢之準。其於嚴齋後，邪魔現形，初誘以饕，繼誘以傲，卒

誘以貪，吾主一一拒之，纖悉不容。蓋訓人於被誘時，不可懈怠，亦不可畏葸，當立即拒之。拒敵誘莫善於仰賴聖心。耶穌曾謂聖女瑪加利大曰，將爾偏私交托予心，則不難於壓抑矣。幸哉，聖心爲克欲良方，拒魔真則，今而後我將切賴聖心，而無慮三仇之多誘矣。

終思 聖保祿謂吾主除罪過之外，事事親嘗。其在萬苦中，聖心堅決超羣，從未退避。山園祈禱後，大難當前，並

無驚懼，告宗徒曰：起往矣，負我者已邇矣。被難時受人冤誣，何難一啟口以辨之，然吾主嘿不一言，如聾如啞。此無他，因聖心立意忍苦，不欲白其冤誣也。吾靈於此，蓋亦仰法聖心，忍受貧病侮辱，總不出愁怨之聲，蓋亦毅然立志，翻然改悛，不復沉迷於罪過之中。

聖心忍耐 第二十五日

定像 想見吾主飢寒備受、徒步艱難、聖心時常忍耐。

特求 求主賜我寵佑、仰法聖心之忍耐。

撮意 初思、聖心忍耐世苦。繼思、聖心忍耐罪人。終思、忍耐有何益效。

初思 吾主在生、無苦不受。避難則忍勞、受誣則忍冤、作工則忍瘁、受辱則忍恥、家居則忍貧、被釘則忍痛。總之
一生多難、不啻常負十字架。然聖心一意承順、絕無

私怨之思。譬之高山大嶺，雖狂風衝擊，鎮定不搖。大哉聖心之忍，如淵無底，如海無涯，誰克知其所至哉。吾自省之，大相刺謬。小苦灰我志，微辱亂我心。今而後，我將仰法聖心，堅忍此生逆境。蓋聖心之德表，即判我之典則也，可不懼哉。

繼思

吾主在天，常默照罪人，使知悛改。然罪人明知故犯，稍善又惡。日復一日，故違主意，欲傷其心。然聖心慈愛依然，含容如故，直至罪人自絕天途，而聖心之望

乃已。更思吾主於聖體中，辱之無言，忘之不去，冒領之亦聽。嗚呼耶穌，爾心仁善無量，予一生多罪，傷爾聖心。求爾全赦我罪，今我定志不敢再犯矣。

終思 忍耐之益，不一而足，特以四者言之。一、忍耐克三仇

之誘。蓋魔誘雖多，耐以敵之，何不可勝之有。二、忍耐悅天主之心。聖基所嘆曰：古者殺牲以祭，今忍耐者，慾爲牲，心爲臺，忍爲劍，主更馨之。三、忍耐可以減苦。夫人與世周旋，不無窘困，惟忍以當之，則雖苦猶輕。

若不忍耐，則更增其苦矣。四、忍耐能滅煉獄之苦，能增天上之榮。聖經云，爲義而被窘難者，乃真福，猶言忍受世苦，乃蒙真福，故忍耐不容緩也。

聖心受辱 第二十六日

定像 想見吾主於聖體中，作被釘像，顯現於聖女安日辣。
特求 求主賜我善想聖心之辱，立功以稍慰之。

撮意 初思，聖心在世受辱。繼思，聖心在聖體中受辱。終思，
聖心願人代補其辱。

初思 侮慢之傷人心，較刀鋸之傷人身，更覺難忍。乃聖心
之辱，莫測之辱也。或誣以饕食，或謗以負魔，或毀以
偽道惑人，或訟以鼓民作亂，或衣以白衣，視爲癡人，

或唾污聖容，等於盜賊。嗚呼！至尊大主，受辱至斯。天上神靈，亦不忍坐視，欲一雪其恥。乃吾大罪人，反敢詡詡誇耀，一受微譏，卽懷恨於心。噫！何驕傲之甚也。繼思聖心於聖體中，被辱尤甚。蓋天下萬方，凡聖體所在，卽有致辱之人。外教人視爲常物，奉教人格敬日疏。聖堂中言語喧譁，往來褻瀆，領聖體者心神未淨，開罪多端。昔如達斯負賣吾主，要惟一次。今負賣聖體者，豈特一人一處而已哉。昔如達斯交吾主於惡人

手、今罪人冒領聖體、直交聖體於魔鬼手。言念及此、可不流淚慟哭、以仰慰聖心之苦。

終思

聖心受辱至極、豈無所望於我。吾主曾謂聖女瑪加利大曰、犯罪人置我體於苦難中、求一憐我慰我者而不可得。從知吾主所深望於我者、分其憂、補其辱、慰其心耳。嗚呼耶穌、爾以至仁洋溢、降世贖人。復留至尊聖體、撫慰我靈。奈世人負愛忘恩、反加侮辱。今予全獻神形、及諸所有、用以稍補爾聖心之辱。

聖心悲痛第二十七日

定像 想見吾主肩負十字架，現於聖女瑪加利大，告其悲痛之故。

特求 求主賜我神近侍聖心，一望無涯之愁海。

撮意 初思，聖心痛聖父受辱。繼思，聖心痛世人下獄。終思，聖心痛世人負愛。

初思 聖心愛慕聖父，必欲顯聖父之榮，譬之孝子愛親，必欲悅親之意，揚親之名而後快。奈自原祖敗命以還，

罪惡日甚，風俗日偷，異端頻起，穢行彰聞，普世人中，每日凌辱聖父，辜負主恩者，不知凡幾。聖心默念其情，慘然動念，一若億萬利劍刺入心中。達未王曾代主言曰：罪人棄主，致我心憂。嗟夫吾靈，聖心之痛，亦吾罪所致，將何以解之，何以慰之。

繼思

聖心愛人至切，欲人咸救其靈。然恪遵主誠，獲享天榮者，不知千百人中能有幾人。吾主降生前，普世人，民溺於邪謬。降世後，異端蜂起，邪說風行，人之被其

惑而不知返悔者，不可勝數。卽奉教之人，亦多故犯主命，自取永刑者。聖心念及於此，不覺悲痛之至。昔梅瑟寧主除其名於天冊，而赦宥斯民。聖保祿亦願代同族人見棄於基利斯多。異哉，二聖人哀恤人靈，至於斯極。况聖心愛人遠出二聖上乎。爲母者未有不哭其子之亡，况聖心愛靈遠勝於母之愛子乎。噫，聖心之痛，可勝言哉。吾靈思之，蓋亦救助人魂，以慰聖心之苦。

終思

聖心憂傷之故，尤在特寵之人。耶穌告聖女瑪加利
大曰，常人惟傷我身，我特寵之人，竟傷我心。一日聖
心顯現，傷破血流，告聖女曰，予特寵之人，傷我至此。
予簡彼本爲息我怒，今反害我若是，可不痛哉。若不
速改前非，將加以重罰。吁，耶穌乎，我卽爾特寵之人。
爾造我贖我，又以聖體養我靈，聖寵扶我弱，受爾私
惠公恩，不勝屈指。我實多犯罪過，傷爾聖心。求爾助
我力弱，至死日進於善功。

聖心憂悶 第二十八日

定像 想見吾主在山園中祈禱，血汗濺衣。

特求 求主賜我寵光，俾知罪過之重。

撮意 初思，聖心憂傷之切。繼思，憂傷之故。終思，血汗之由。

初思 耶穌於山園中，謂諸徒曰，吾靈憂將死矣。聖盎博羅

削解曰，維時主性之樂，不通於聖靈下分，而人性之

憂，齊集心中，故聖心憂痛之切，古今無有及之者。聖

女瑪加利大一日默想禱主。主語之曰，予於山園中

見棄於聖父，見絕於世人，見抑於衆罪，一時悲痛之深，甚於受難之時。由是以思，聖心之苦，莫可名言也。吾靈於此，蓋亦仰契聖心，分其憂苦，痛哭一生罪過。繼思

聖心悲痛之故，經紀其四。一曰怖怯。時吾主以將受之難，與後世聖人應受之苦，一一列陳心目，惶悚頓生。二曰憂悶。聖父尊無限量，恒受世人凌辱，聖心想念及此，不禁憂悶至極。三曰灰心。世人多罪，辜負主恩，雖吾主受苦至死，人多不得其效，故聖心傷之。四

曰終危。因聖靈上分，願代死贖人，然聖靈下分，覺貪生畏死，兩念相攻，如魂魄相離之苦。吾靈想念及此，應亦豁然醒悟，不復與聖心以煩悶之緣。

終思

吾主於憂苦中哀禱三次，其時憂愈深，禱愈久，遍體血汗直流至地。嗚呼耶穌，爾清潔無瑕，無罪可悔，何以聖血沾衣，流注至地。噫，吾知之矣，我罪之重致爾憂，吾心之忍傷爾心。今求爾賜我聖寵，俾克改我過，去我惡，斷絕我各種惡情，一心愛爾於萬有之上。

聖心願望 第二十九日

定像 想見吾主，現於聖女瑪加利大，示其願望之事。

特求 求主賜我真光，明知聖心之願望，而勉力行之。

撮意 初思，聖心願榮聖父。繼思，聖心願人報愛。終思，聖心

願人領聖體。

初思 先知士稱耶穌為願望之人。願望維何，曰：顯榮聖父而已。吾主智識無窮，明知聖父之尊，主體之美，世人之賤，罪過之醜。意欲消除慝惡，大顯主榮。自降生以

至歿日，聖心之注意在此。今在聖體中，亦同此悵望，同此思維。宛若常向聖父曰：願爾名見聖，爾國臨格。但主榮顯於真德，故聖心望人勉進於善，日積功勛，斯能永顯主榮於天國。乃吾返躬自問，意想何在，願望何在，致力又何在。噫，吾心醜惡，念念空虛。察平日縈懷者，要皆雜念，無益於靈，無榮於主。噫，我何辱主之甚，自欺之甚歟。

繼思

耶穌曰：予投火於世，欲其燃而後已。將受難，遺訓諸

徒曰、爾與我偕、我亦與爾偕。復活後、詰伯多祿愛否、凡此聖諭、皆欲人還愛吾主、揚其聖愛。嗚呼吾主、爾仁無量、爾愛無涯、誰能念爾惠、思爾愛、而仍不切愛爾心。但我心如鐵石、毫不動情。仰望賜我熱情、變化我心、而我願足矣。

終思 吾主諭聖女瑪加利大屢領聖體、償補聖心所受之辱。又曰、予欲人敬拜聖體、然無一人報我愛、遂我願者。然則聖心之意、欲人恭領聖體、代雪其恥。噫、是何

大福哉。耶穌眞主眞人，降我心中，爲我心主。赦我罪，助我弱，慰我憂，安我苦，啟我愚昧，除我偏私。但我信望未堅，敬拜未切，故多領無功，反加侮辱。自今以往，不敢冒昧從事，增益聖心之恥辱矣。

聖心榮樂 第三十日

定像 想見聖心，發露於天，諸神聖環侍讚頌。

特求 求主賜我聖佑，稍識聖心之榮福。

撮意 初思，聖心之榮。繼思，聖心之樂。終思，契合聖心之福。

初思 經云，自下必被陟，斯言特於聖心驗之。蓋吾主謙下如奴，聖父擢之天上。被難時受人枉判，世盡日公審萬民。惡人釘之於十字架，天主加以名上之名。聖心隱於麪酒形中，人目不見其光耀，然諸天神環繞敬

拜，日夜不離。况今聖心在天，榮超羣聖，上契聖三。噫，聖心之榮，誰得測其萬一哉。吾靈於此，應亦慶主尊榮，倍切熱愛之念。

繼思

吾主在天，聖靈常見主性，悅樂無窮。其神情之恬愉，通於聖心，宛若悅樂汪洋，通於情海。故聖心之樂，雖神聖亦不能測，而况常人乎。再思聖心，知聖父之榮大顯於世，在天諸聖踴躍讚頌，在世善人推誠昭事，吾主每一念及，不禁心怡神慰。吾靈於此，盍亦積善

立功日增聖心之樂。

終思

吾人在世，總無安樂之地，惟契合聖心，得蒙安福。憂
罪乎，聖心爲滌罪之源。昏昧乎，聖心爲聖學之塾。悲
傷勞倦乎，聖心爲福樂之園。神魂之宅。心神苦渴，被
誘遇難乎，聖心爲活水之泉。敵仇之壘。奇哉聖心，衆
恩全備，萬福充盈。我今全獻神形，及諸所有，惟願潛
伏聖心之下，永遠近侍而不離。

耶穌聖心新禱文

啟天主矜憐我等。

應基利斯督矜憐我等。

啟基利斯督俯聽我等。

應基利斯督垂允我等。

啟在天天主父者。

贖世天主子者。

聖神天主者。

天主矜憐我等。

應矜憐我等。

啟三位一體天主者。

應矜憐我等。

永遠聖父之子，耶穌之聖心。

耶穌聖心，聖神所成於貞母胎中者。

耶穌聖心，全體合於天主物爾朋者。

耶穌聖心，無限尊威者。

耶穌聖心，爲天主之聖殿。

耶穌聖心，爲至上者之幕府。

耶穌聖心，爲天主之宮，上天之門。

啟耶穌聖心，爲愛德之烈審。

應矜憐我等。

耶穌聖心，爲公義慈愛之聖所。

耶穌聖心，充乎仁慈愛情者。

耶穌聖心，爲諸德之淵。

耶穌聖心，最宜受頌者。

耶穌聖心，爲衆心之王，并爲其所向者。

耶穌聖心，爲上智神明諸藏之所在。

耶穌聖心，爲主性全備之所居。

啟耶穌聖心，爲聖父所忻悅者。

應矜憐我等。

耶穌聖心，我等咸受其盈餘。

耶穌聖心，爲永陵之願望。

耶穌聖心，最耐極慈者。

耶穌聖心，富有以賜禱爾者。

耶穌聖心，爲神命聖德之源。

耶穌聖心，爲我罪之補贖。

耶穌聖心，飽受凌辱者。

啟耶穌聖心，爲我罪受傷者。

應矜憐我等。

耶穌聖心，至死順命者。

耶穌聖心，爲長矛所刺透者。

耶穌聖心，爲諸忻慰之泉。

耶穌聖心，爲我生命與復活。

耶穌聖心，爲我安樂與平和。

耶穌聖心，爲贖罪之犧。

耶穌聖心，爲望爾者之救援。

啟耶穌聖心，爲臨終賴爾者之祈望。

應矜憐我等。

耶穌聖心，爲諸聖人之懼怖。

啟除免世罪天主羔羊者。

應主赦我等。

啟除免世罪天主羔羊者。

應主允我等。

啟除免世罪天主羔羊者。

應主憐我等。

啟仁善心謙之耶穌。

應懇使我心，似爾聖心。

祝文

請衆同禱。天主於爾聖子被吾罪所傷心內，慨施我等仁愛無限之寶藏。今懇求爾，賜我等虔誠敬愛伊心者，亦克善盡補辱之職。亦爲是我等主耶穌基利斯督，其偕爾偕聖神，爲一天主，乃生乃王，世世。亞孟。

向耶穌聖心贖罪誦 耶穌聖心瞻禮日誦

至和藹之耶穌，爾之聖愛，廣被於人。人竟忘之，忽之，侮辱之，而以忤逆酬報之。今我等俯伏於爾臺前，願以特別敬禮，補償爾至愛聖心，隨處飽嘗凌辱，飽受野蠻無禮之加。但我等

自維、亦嘗不恭不敬、故深自痛悔、懇爾仁慈寬宥。又願擔承補贖之工、爲我等、爲彼衆。凡遠離救靈正路者、凡執迷不信、不認爾爲善牧首領者、凡背棄領洗之誓願、避爾駕馭之軌轍者、我等亦願補之償之。至若可痛可哭之罪惡、如起居之放縱、服飾之不莊、醜習陋行、陷害善靈、不守瞻禮日期、詛說爾、與在天諸聖、詆毀爾代位、誣譏爾司鐸、輕忽爾聖愛之聖事、甚至有褻瀆冒領者、加以萬國萬民、侵犯爾所立教會應有之名分、又違抗教會訓導之神權。凡此種種罪惡、我等願

悉數懺悔之、並逐一賠補之。噫、我等且巴望流血、以滌除衆罪。茲爲賠補主榮所受凌辱、將昔爾在十字架時、奉獻於聖父、今在祭臺上、日日復獻之贖罪犧牲、并以童貞聖母、及諸聖人、信人所作之補贖、一一敬獻於爾。今又誠心許願、以後要竭吾力、賴爾佑、堅持吾信德、清潔吾行爲、全守爾誠命。凡關愛德之工、拳拳奉行勿怠。用以補贖我等及衆人所犯之愆尤、與輕忽爾天大愛情之罪過。倘有人加爾侮慢、吾必竭力阻止、并願導引多人歸向於爾。吁、至仁耶穌、今因救世聖

母童貞瑪利亞之轉達，懇爾收受此補過之虔誠，并賜我等
忠信事爾，恒心至死，迄赴天鄉。乃爾與聖父及聖神，惟一天
主，永生永王於世世者。亞孟。

右向耶穌聖心贖罪誦，每年逢耶穌聖心瞻禮日，於堂
內顯供聖體前，念聖心禱文後，加念之，可得七年七次
四旬大赦。若告解領聖體而念者，可得全赦。又不拘何
處何時私念此誦者，可得三百日大赦。倘日誦而告領
拜堂者，月內亦可得全赦一次。再者，從前所頒於耶穌

聖心瞻禮日念奉獻人類於聖心誦之大赦，悉行取消。

一千九百廿八年六月一號

教皇庇護第十一准

奉獻人類於聖心誦耶穌帝王瞻禮日誦

至飴耶穌、人類贖主。垂視我衆俯伏爾臺前，皆爾所屬，皆願屬爾。今欲契爾益堅，各願獻己於爾聖心。夫人未識爾者，衆焉。違爾誠，背棄爾者，亦衆焉。至慈耶穌，垂憫若曹，引之同歸爾聖心。主乎，不離爾之信人，與夫棄爾之蕩子，懇爾皆爲之王，特使蕩子速返父家，勿以飢困而亡。其爲謬理所惑，或因

異見而離散者，懇爾亦爲之王，導其崇正同信，速成一棧一
牧。其尙迷於崇邪或回教者，懇爾亦爲之王，使之出暗入光，
獲躋天主之國。尙求慈目，垂視曩爲特簡民族之後裔。昔日
若曹呪呼於己身之聖血，茲亦降沐之，俾得救贖與生命。主
乎，賜爾教會平安無損，得以自由。又賜各國人民，循序處泰。
卒使大地全球，同聲齊呼，救我生命之聖心，咸願其獲讚頌，
且榮且耀，永世無疆。 亞孟。

當今教皇庇護第十一，於一千九百廿五年，十二月十

一號。諭每年逢耶穌帝王瞻禮日，復念此奉獻誦。

補辱誦首瞻禮六誦

耶穌至尊之心，乃天主仁愛之源。吾今憶爾諸恩，深痛我之無情。蓋吾天主於無始之始，愛吾人類，造我如爾聖像。賜我得生於世，本欲今世錫之聖寵，後世加之永福，以充爾愛人之量。是以人雖負罪，忘爾至愛，主不但不棄，反爲救人之故，甘取人身，代人贖罪。畢生受苦，而以至被釘架上，傾流聖血，以滌人罪。爾之仁愛，誰能推測其萬一。况又規定聖體，爲我

神糧。主之聖愛，神人誰能測乎。奈人受恩極渥，負罪綦深。忘爾愛，違爾教，辱爾名，棄爾規，種種背爾之罪戾，深刺爾心，莫可憶量。吾誠卑污罪僕，誰能撫慰爾心，仰報爾愛。惟欲表微誠，自願憶爾於無限，愛爾於無終焉。望主常以仁目，憐視此報愛之罪人。耶穌乎，我伏於爾足下，敬將神形全獻，爲補爾所失之榮。痛心慘悔，爲滌人所犯之罪。本願捨生流血，以洗滌罪愆。然此係主恩，何敢奢望。惟哀懇吾主聖心，憐憫罪人，恕其瞽盲之罪。赦其罪罰，化其頑梗之心。加以神力，俾得胥

爲爾弟子，仰法爾聖心之德，後享爾所許之福。 亞孟。

右經係從真福高隆汴司鐸著作中撮錄

奉獻全家誦

吾主耶穌，我今跪在爾聖心像前，感念爾諸凡恩德，愛慕爾無窮美善。回念爾告聖女瑪加利大，願各國君臣，咸獻於爾。我今體爾聖意，依賴無原罪聖母瑪利亞，及中國大主保聖若瑟轉達，將我全家獻爾聖心。願家中常有信望愛三德，人勤謹行事，用心祈禱，內外平安。懇求爾仁慈聖心，作吾家

主、理我諸務。吁、可愛之耶穌、我將一切景況、無論患難喜慶、全託於爾。求爾降福於生者、亡者、出外者、在家者、凡爲我家之人、莫不保護。倘我儕之中、有人傷爾聖心、求爾寬宥、仍復垂憐。吁、耶穌聖心、爾固慈善無量。我求爾保佑天下教友、并使中國外教進教、聖教平安。噫、仁愛之海洋、求爾助我全守主誠、卒得善終之恩。用望全家均至天堂、永謝爾聖愛。亞孟。

24
力E

404044

力E